

Aneks „B“

predmeti protiv lica sa A-liste Pravila puta i unapređenje regionalne saradnje

U cilju osiguranja veće transparentnosti rada pravosuđa na predmetima ratnih zločina, prevazilaženja problema uočenih u praksi, te unapređenja regionalne saradnje, revidirana Državna strategija za rad na predmetima ratnih zločina dopunjuje se kako slijedi:

1. Predmeti/lica sa ranijom standardnom oznakom A

Tužilaštvo Bosne i Hercegovine se obavezuje da će u roku od 90 dana od usvajanja Državne strategije dostaviti podatke o predmetima/licima sa ranijom standardnom oznakom A čije je vođenje postupka ustupljeno entitetskim tužilaštvima i Tužilaštvu Brčko Distrikta Bosne i Hercegovine.

Izveštaj odnosno statistički prikaz procesuiranja predmeta krivičnih djela ratnih zločina protiv lica sa A-liste Pravila puta treba sadržavati slijedeće podatke: broj lica koja su pravosnažno presuđena (uključujući podatka o vrsti presude –oslobađajuća/osuđujuća), broj lica čiji se predmeti nalaze u žalbenom postupku, broj lica koje čekaju prvostepene odluke, broj lica koja su trenutno pod istragom, broj lica protiv kojih je obustavljena istraga, broj lica protiv kojih nije pokrenut postupak odnosno koji još uvijek nisu uzeti u rad od 2004.godine tj. momenta kada su predati Tužilaštvu Bosne i Hercegovine (broj preostalih predmeta).

Tužilaštvo Bosne i Hercegovine, kao i sva ostala tužilaštva, će prioritetno rješavati najsloženije predmete ratnih zločina sa naglaskom na predmete/lica sa ranijom standardnom oznakom A, te će s tim u vezi sva tužilaštva entiteta i Brčko Distrikta BiH redovno, svakih 90 dana, nakon usvajanja Strategije o tome izvještavati Tužilaštvo Bosne i Hercegovine, a ono Nadzorno tijelo putem svog predstavnika u istom.

Kako bi se osiguralo prioritetno rješavanje najsloženijih predmeta ratnih zločina, sa naglaskom na predmete/lica sa ranijom standardnom oznakom A, Visoko sudsko i tužilačko vijeće će u roku od 30 dana od dana usvajanja revidirane Državne strategije usvojiti smjernice za glavne tužioce o donošenju obavezujućih uputa tužiocima koji rade na predmetima ratnih zločina kako bi ih obavezali na provedbu revidirane Državne strategije i uputa Nadzornog tijela, kao i njegovih preporuka. Glavni tužiocima će na osnovu smjernica donijeti obavezujuće upute u roku od mjesec dana od dana usvajanja smjernica.

Visoko sudsko i tužilačko vijeće će u roku od 60 dana od dana usvajanja Državne strategije usvojiti izmjene i dopune odgovarajućih propisa kako bi se osigurala disciplinska odgovornost sudija i tužilaca u slučaju neispunjavanja obaveza koje proizlaze iz revidirane Državne strategije, te drugih obavezujućih uputa koje se odnose na prioritetno procesuiranje najsloženijih predmeta ratnih zločina sa naglaskom na najsloženije predmete/lica sa ranijom standardnom oznakom „A“.

Kako bi se olakšalo ostvarenje strateških ciljeva i dodatno osnažila transparentnost u ovoj oblasti Ministarstvo pravde Bosne i Hercegovine će, bez odlaganja, Vijeću ministara Bosne i Hercegovine dostaviti Odluku o formiranju Nadzornog tijela za praćenje provođenja revidirane Državne strategije za rad na predmetima ratnih zločina u sastavu iz Strateškog cilja IX, a u cilju funkcionalnosti Nadzornog tijela i osiguranja neprekidnog rada biće imenovani i zamjenski članovi, kao i po jedan član bez prava glasa iz Suda Bosne i Hercegovine i Tužilaštva Bosne i Hercegovine, te u svojstvu posmatrača predstavnici OSCE-a, Ureda tužioca MRMKS i Kancelarije Evropske unije.

Nadzorno tijelo može po potrebi angažovati nezavisne eksperte prava iz akademske zajednice. Nadzorno tijelo ima obavezu da usvoji smjernice o odnosima sa javnošću, kojima će urediti redovno obavještanje o svom radu, kao i način komunikacije sa medijima, zainteresovanim predstavnicima civilnog društva, udruženjima žrtava...

2. Regionalna saradnja

Regionalna saradnja u progonu ratnih zločinaca će se realizovati u skladu sa međunarodnim standardima i principima, međunarodnim bilateralnim i multilateralnim sporazumima, kao i protokolima, te drugim propisima koji uređuju međusobnu saradnju. Regionalna saradnja će se odvijati i kroz saradnju sa MSMKS-om, Uredom tužioca MRMKS-a u skladu sa rezolucijama Vijeća sigurnosti 1503 i 1534.

Cijeneći opredjeljenje pravosuđa Bosne i Hercegovine kada je riječ o postizanju pravde kao ultimativnog cilja krivičnog postupka neophodno je da svi organi u Bosni i Hercegovini u skladu sa svojim nadležnostima sarađuju sa Uredom tužioca MRMKS.

U cilju unapređenja regionalne saradnje i jačanja nadzora nad realizacijom Strateškog cilja VII, Odlukom o formiranju Nadzornog tijela za praćenje provođenja revidirane Državne strategije za rad na predmetima ratnih zločina naložiće se Nadzornom tijelu da sa posebnom pažnjom prati regionalnu saradnju i procjenjuje ostvarene rezultate u odnosu na ciljeve revidirane Strategije. U tom cilju, Nadzorno tijelo će se prije svega usmjeriti na razmatranje najboljih praksi u ovoj oblasti, odnosno nadzor nad provođenjem gore spomenutih principa saradnje u kontekstu pronalaženja mehanizama za rješavanje aktuelnih problema. Takođe, Nadzorno tijelo će pratiti rješavanje pitanja koja se odnose na saradnju sa susjednim zemljama kada je riječ o kršenju međunarodnog humanitarnog prava na teritoriji Bosne i Hercegovine, te o tome izvještavati Vijeće ministara Bosne i Hercegovine, uz preporuke o mjerama potrebnim za ostvarenje ovog strateškog cilja.